

**Naaja Nathanielsen  
Attaviitsoq**

**UPA 2016/43 og 125  
28. april 2016**

**Ilisimatusarfimmi Tusagassiornermik Bachelorinngorniartut atuartinneqarneritigut oqaatsitigut piginnaasat qaffassarnissaasa salliutinneqarnissaannut Naalakkersuisut iliuuseqaqqullugit peqquneqarnissaannut Inatsisartut aalajangiiffigisassaattut siunnersuut. Ataatsimut isigalugu kalaallit oqaasiisa atorneqarnerisa ineriartortinneqarnerisalu nukittorsarneqarnissaannut iliuuseqarnissami Ilisimatusarfimmi Tusagassiornermik Bacheloritut ilinniarsimasut oqaatsitigut piginnaasaasa qaffatsinnissaat qulakkeerneqassaaq. Kissaatigineqarpoq suliniut ukiut sisamat qaangiussimaleriarpap nalilersorneqassasoq.**

(Inatsisartunut ilaasortaqaq Mimi Karlsen, Inuit Ataqaatigiit)

***aamma***

**Inatsisartut aalajangiiffigisassaattut siunnersuut, tamatumuuna Naalakkersuisut peqquneqassasut sulissutigissallugu, nunatsinni tusagassiutini kalaallisut oqaatsitta atorluarneqarnerulernissaat.**

(Inatsisartunut ilaasortaqaq Mimi Karlsen, Inuit Ataqaatigiit)

Kalaallit oqaasiisa oqaaserpassuarnut allanut naleqqiullugit nukittuumik inissisimanerat ulluinnarni atorneqarnerannik peqquteqarpoq. Kisiannili atorneqartanngilaq naammannngilaq – eqqortumik atorneqassapput. Taamaattumillu oqaatsit kikkut tamarmik akornganni kukkusumik atorneqartarpata, tamanna ajornartorsiutaavoq piviusoq. Ataasiarlunga kalaallisut ilinniartitsisoqarnikuuvunga piseqqusaarutinik atuarnissannik inerteqquteqartumik, taakkua kukkuneqarpallaarnerat pissutigalugu. Kisianni aamma kikkut tamarmik takusinnaasaannik allagartalersuinerit pisortallu saqqummersitaat aamma kukkuneqartarput.

Siunnersuuteqartoq oqarmat isumaqatigaara, oqaatsit danskisuumiit kalaallisuumut nutserneqaraangata ajortoortit amerlasoorujussuusartut. Oqaatsinut allanut nutserinermi paasisimasaqarlunissaq piumasaqaataavoq. Oqaatsit ataasiakkaat oqaloriaatsillu ilisimasariaqarput. Kisianni aamma allattup allataanut nutserneqartussamut piumasaqaatitaqarpoq. Allakkat "nutserisumut inussiarnisaartumik" allannerat ajornakusoortorujussuuvuq ilinniarniarlugulu piffissartornartorujussuulluni.

Taamaattumik maanna siunnersuutit piviusut oqallisigaagut.

Siunnersuummi tusagassiortunngorniat ilinniarnernannut tunngassuteqartoq pillugu siunnersuut itigartippara. Ilisimatusarfiup nammineerluni ilinniakkanut aalajangiisinnaatitaanera ataqqigakku taamatut isiorpunga. Kisianni soorunami Ilisimatusarfiup aqutsisui siulersuisuilu oqaatsit atorneqarnerannik qitiutitsinissaat kaammattuutigaara. Ilisimatusarfimmi kandidatinnngortut Nunatsinni sulilernissaat naatsorsuutigisariaqarparput, taamaattumillu taakkua ilinniarnnerisa nalaanni oqaatsinik atuinerup qitiutinneqarnera pissusissamisuginnarpoq.

Oqaatsit tusagassiutini atorneqarnerisa nukittorsarnissaat pillugu siunnersuut ataatsimiititaliamut innersuuppara. Taamaakkaluartorli isumaqarpunga, siunnersuut eququilluannngitsoq. Taamaattumik ataatsimiititaliap isumaliutissiissummini iliuusissanik aallarnisarneqarsinnaasunik toqqartunik siunnersuuteqarnissaa ajussanngilaq. Oqaatsit tamanut ammassuni atorneqarneranni nukittorsarneqarnissaannut ilapittuutaasinnaasunik sunik Naalakkersuisut saqqummiussaarsinnaappat? Taamaattumik neriuppunga, ataatsimiititaliap allannguutissatut siunnersuut siunnersuummi periarfissanik erseqqissaasoq isumaliutigissagaa.